

- 1^r Wer wünschet das er nit verstot
- 2^r Vnd nitt syn sachen setzt zů got
- 3^r Der kumbt zů schaden dick vnd spott



von vnutzem wunschen

- 1 Der ist eyn narr der wunschen düt
- 2 Das jm als bald schad ist als gůt /
- 3 Vnd wann ers hett vnd wurd jm wor
- 4 So wer er doch eyn narr als vor

5 Mydas der künig wünschen wolt
 6 Das als / das er angriff / würd goldt
 7 Do das wor wart / do leidt er nott
 8 Dann jm zů gold wart wyn vnd brot /
 9 Recht hatt er / das er deckt syn hor
 10 Das man nit säch syn esels or
 11 Die dar noch wüchsen jn dem ror
 12 We dem / syn wünsch all werden wor /
 13 Vil wünschen das sie leben lang
 14 Vnd dünt der sel doch also trang
 15 Mit schlenmen / prassen im wynhuß
 16 Das sie vor zyt muß faren vß /
 17 Dar zů / ob sie schon werden alt
 18 Sint sie doch bleich / siech / vngestalt
 19 Jr backen vnd hüt sint so lår
 20 Als ob eyn aff jr müter wår /
 21 Vil getzlicheyt die jugent hat
 22 Das alter jn eym wesen stat
 23 Jnn zittern glyder / stym / vnd hirn /
 24 Eyn trieffend naß / vnd glatzecht stirn /
 25 Synr frowen ist er vast vnmår /
 26 Jm selbst / vnd synen kynden schwår
 27 Jm schmeckt vnd gfelt nüt was man düt
 28 Vnd sicht vil / das jn nit dunckt güt /
 29 Welch leben lang / die hand groß pin
 30 Allzyt jn nüwem vnglück syn
 31 Jn truren vnd jn ståtem leidt /
 32 Enden jr tag jn schwartzem kleyd
 33 Nestor / Peleus / vnd Laertes /
 34 Beklagten sich jm alter des

35 Das sie zů lang ließ leben gott
 36 Do sie jr sůn an schowten dot /
 37 Wer Priamus gestorben vor
 38 Vnd het gelebt nit so vil jor
 39 Sãh er nit leyd so jãmerlich
 40 An sůn / frow / dõchter / stat / vnd rich /
 41 Wann Mythridates / vnd Marius /
 42 Cresus / vnd der groß Pompeyus
 43 Nit werent worden also alt
 44 Werent sie dott in grossem gwalt /
 45 Wer hüpscheyt jm / vnd synem kynd
 46 Wünschet / der sũcht vrsach zů sünd
 47 Wer Helena nit gewesen schon
 48 Pariß hett sie jn kriechen gelon /
 49 Wer hãsllich gsyn Lucrecia
 50 Sie wer geschmãhet nit also /
 51 Hett Dyna kropff vnd hofer ghan
 52 Sychem hett sie gelossen gan /
 53 Es ist gar selttten das man treit
 54 Bynander schonheynt vnd küscheyt /
 55 Vor vß / die hübschen hansen nũn
 56 Die went all bũbery yetz dũn
 57 Vnd werdent doch gefellet dick
 58 Das man sie *sicht* jm narren strick /
 59 Mancher wũnscht / hüser / frow / vnd kynd
 60 Oder das er vil gulden fynd
 61 Vnd des glich goückels / das gott wol
 62 Erkennt / wie es geroten sol
 63 Dar vmb gibt er vnß ettwan nüt
 64 Vnd das er gibt / nymbt er zů zyt

58 *sicht*] *sticht* GW5041 GW5046 GW5047

65 Ettlich dem gwalt ouch wünschen noch
 66 Vnd wie sie stygen vff vast hoch
 67 Vnd btrachten nit das höher gwalt
 68 Dest hoher wider abher falt
 69 Vnd das / wer vff der erden lyt
 70 Der darff vor vall sich vörchten nyt
 71 Gott gibt vnß alles das er will
 72 Er weißt was recht ist / was zů vil
 73 Ouch was vns nütz sy / vnd kum wol
 74 War vß vnß schad entspringen sol
 75 Vnd wann er vnß nit lieber hett
 76 Dann wir vnß selb / vnd das er dāt
 77 Vnd macht vnß (was wir wüschttten) wor
 78 Es rüwt vnß / ee vß kem eyn jor /
 79 Dann vnser bgir die macht vnß blint
 80 Zů wünschen ding / die wider vnß sint /
 81 Wer wünschen well das er recht leb
 82 Der wüsch das jm gott dar zů geb
 83 Eyn gsunden synn / lib vnd gemüt
 84 Vnd jn vor vorcht des todes bhūt
 85 Vor zorn / begyr / vnd bösem gydt
 86 Wer das erwirbt jn diser zyt
 87 Der hat syn tag geleyt baß an
 88 Dann Hercules ye hat gethan
 89 Oder Sardanapalus hatt
 90 Jn wolust / gfüll / vnd fäderwatt
 91 Vnd hatt alles das jm wurt sin not
 92 Darff nit an rüffen glück für gott
 93 Eyn narr wüsch synen schaden dick
 94 Syn wüsch würt offt syn vnglück